

重修族譜序

莫氏世系出於江陵漢有富人以游俠著迄南北朝莫含才器深為魏穆帝所重其後聞人輩出史不絕書代遠年湮語之不詳矣我族

始祖德善公由東莞大井遷居本色翠微 八世祖與京公復遷會同舊譜具載彰彰可考但日久殘缺前清乾隆年間十世祖輝巖公擬返大井合族而修明之久未得間遷延不果僅將我房六世以後重修十一世祖蔭廷公復略增補近八十年無踵事者瓜瓞之綿陶復陶次椒聊之實盈掬盈升甚且散處四方僑商外埠有數年而不一見者有數十年而不一見者非詳加纂叙恐年湮代遠等於歷代聞人語焉不詳大失木本水源之意偶與父老談及均表同情爰懇衆叔父詠虞三哥及漢肩任應需經費由藻泉叔父捐助祇以商務煩擾無暇兼顧令漢專理其事漢學業就荒柳居日

少茲事體大懼不勝任重承諄囑不敢不勉今書已告成於族譜體例或不盡同而支派源流親疏遠近昭穆秩序噴瘞所原潛德幽光遺徽軼史亦庶乎大備觀是譜者孝弟之心可以油然而生矣惟是大井宗家原歸一脉此次復不得合併同修以竟輝巖公之志於心不無耿耿後有作者尚其補予不逮歟

中華民國八年歲次己未 高傳孫履漢卓謹序